

Jesusũ tsuma betsã Jesusũ enabu Hebreunawabu keneshunikiaki HEBREUS

Natiã Deusũ hawẽ bakewẽ hawẽ hãtxa nuku unãmanikiaki, na hãtxarã

1 ¹Hãtxa pepa ẽ matu bumai uĩkĩ nĩkairakãwẽ. Ha dukunã, nukũ shenipabube Deus hãtxairã, hawẽ hãtxa yuishunika tibiwẽ hawẽ hãtxa hatu yuimakĩ hawẽtxaĩs hatu yusĩkĩ betsa tibiwẽ tashnimakĩ hatu yuikubainiki. ²Haska wabiakubaĩkĩ hawẽ bake kuxipa watã mai hirabi dasibi damiwamanishũ dasibi ibu wamanishũ natiã hawẽ henekĩ hawẽ huni bake hãtxamakĩ Epa Deusũ hawẽ hãtxa nuku unãmaniki. Haskakiri matu ana yusĩnũ nĩkakãwẽ. ³Hawẽ Epã kuxipaya txashakapa hawẽrua keskaritũ dasibi betsa betsapa damiwani hawẽ hãtxa kuxipawẽ mekekubaĩmiski, hau hawa benuyamanũbunã. Ha inũ, hawẽ Epa nuku daewashuni mawakĩ nukũ txakabu buatã hawẽ Epa kuxipahaira dasibi binu keyuatũ yusiuri tsauwa nai anua ma habe shanẽ ibukũkainikiaki.

Deusũ bake pepatũ nai tsumabu binu keyunikiaki, na hãtxarã

⁴Hau Jesusũ dasibibu yunu keyukubaĩshanũ Deusũ yuikĩ: “Narã, ẽ bakeki”, akĩ nai tsumabu dasibi hatũ kuxipa binumaniki, hawẽ kena tushkutima inãkinã. ⁵Deus hawẽ bakekiri hãtxani matu yuinũ nĩkakãwẽ. Deusũ hawẽ nai tsuma betsa yuikĩ:

“Mĩ ẽ bakeki”,

akĩ betsa yuitaskama inikiaki. Hakia hawẽ bake bestikiri hãtxairã, eskaniki:

“Mĩ ẽ bakerã,

natiã ẽ hiwea mia inãkĩ ẽ mia yunuaii”,

aniki. Ha inũ, hawẽ nai tsumabukiri haska yuiamabia hawẽ bakekiri yuikĩ:

“Earã, ã hatũ epa ikũkaĩshanaii, hawenarã.

Harã, ã bake ikũkaĩshanikiki, enarã”,

Deusũ arianiki. Hakia hawẽ nai tsumabu hawẽ bakebumawẽ taea haska hatu yuitaskama iniki. ⁶Kene betsa anushũ hawẽ bake bestitxai nukũ Hutxi Kayabi Iuwa yurabube hiwemashanaikiri hatuki txanikĩ yuikĩ:

“Hau dasibi ã nai tsumabũ ã bake duawakĩ kẽwãriashanũbũwẽ”, arianiki. ⁷Hakia hawẽ nai tsumabukiri yuikĩ:

“Ë̃ daya hau ea ashunũbũ

niwe birenepa inũ txi here kuxipa keska wakĩ

ẽ nai tsumabũ hau daya betsa betsapa ea habuã ashũkubaĩshanũbũ ã hatu yununiki”,

anikiaki. ⁸Hanushũ hawẽ bakekiri yuikĩ:

“Deusuũ, mia shanẽ ibuirã,

mĩ ea keska shanẽ ibui ikibi ipakeshanaii,

shanẽ ibui hawa txakabu hayamarã.

⁹Hawara pepa abukĩ hamapai txakabu mĩ danãmisrã,

mĩ haskamiswẽ taeshũ ea ã mĩ mekenika Deusũ ã mia katuaki.

Sheni mashu akĩ unãti wakĩ ã miwẽ benimaii,

mĩ haibuaibu keskawama hatu mia binumakinã”,

aniki. ¹⁰Ana hawẽ bake yuikĩ:

“Shanẽ Ibuũ, hawa hayamahairabiakẽ

mianã, damiwakĩ taewakĩ nai inũ mai hirabi ibubis mĩ damiwaniki.

¹¹Miarã, hawa betsama mĩ ipakeshanaii.

Hakia mĩ dami wanirã, keyushãkanikiki, tari txukai keskairã.

¹²Tari katũkĩ akawamisbu keska wakĩ

dasibi tsuãra tari pekatã betsa sawemis keska wakĩ

nai inũ mai mĩ ana bena washanaii.

Hakia miarã, maei mĩ betsatirumahairaki,

mĩ hiwea keyuisma mĩ hayarã”,

aniki. ¹³Hanushũ Deusũ hawẽ nai tsumabu betsa eska hatu yuitaskama iniki:

“Miki sinatakĩ mia danaĩbu kupikĩ

ẽ hatu mia maemakĩ keyumariama manai ã yusiuri tsauyuwe”,

aki hawẽ bakekiri besti hãtxanikiaki, hawẽ nai tsumabukiri

yuiamarã. ¹⁴Ha inũ, Deusũ hawenabu kayabi habũ hiwea ikibi ika

bitã nũ pashashanaibu nuku yauxikĩ hawẽ nai tsumabũ hau nuku

mekekubainũbũ Epa Deusũ hatu yunukubaĩmiski. Dasibi Deusũ nai

tsumaburã, yushĩki, habũ Deusũ daya ashũmisburã.

Hawẽ pashati kayabi danaĩnã, mesekiaki, na hãtxarã

2 ¹Deusũ bakẽ nai tsumabu binuatũ hamebi hatu yusĩni haskakiri hãtxa nũ nĩkanirã, ana hakiri nĩkahairakubainãkãwẽ, ha henetã

bai betsave nũ buyamanũbunã. ²Ha inũ, hawẽ nai tsumabu hãtxamakĩ uatiã Deusũ hawẽ hãtxa hawẽ nai tsumabuwẽ hatu yusĩmapauniki. Ha Deusũ yunuti inũ hawẽ nemati kuxipa hayaniburã, tsuãra nĩkakĩ txibãma txakabu waibu hawẽ taeshũ hawa kaneama Deusũ hatu kupikubainiki. ³Uĩwẽ. Ha dukũ nukũ Shanẽ Ibũ hamebi hawẽ pashati hakiri ibubis bebũkiri txani taeniki. Hanushũ nuku yubakĩ tsuabũra hakiri nĩkai txanima Deusũ hãtxa nũ unãkubainibuki. Nukuburã, hawẽ pashati ewapa txanima hubianikẽ mekei peama hiwe kayabikatsi ikamarã, haskatã ibubis nũ pashatirubumaki.

Deusũ bake nukũ yura keska iyunikiaki, na hãtxarã

⁴Ha inũ, hawẽ Yushĩ Pepawẽ hawẽ e imakĩ unãmati damiwamakĩ na yuba bena Jesusũ tsumabubetã Epa Deusũ hatu mestẽwãmaniki. Haska wanishũ hawẽ xinãnẽ nuku tibi hawẽ daya betsa betsapa nuku inãmiski, haska xinaĩ keska nuku tibi inãkinã. ⁵Bawaitiã na mai anu Deusũ damiwani anu yurabu hiwebaũshanaibu anushũ hau Deusũ nai tsumabũ yunuyamashanũbũ Deusũ hanu hatu yunuama iniki, na haskakiri nũ hãtxairã. ⁶Hamẽ kene betsa anushũ Davĩ shabakabi wakĩ yuini matu yuinũ nĩkakãwẽ:

“Nũ yurabu hawauma keskabiakẽ
haska mĩ nukuwẽ nuimis ẽ xinãmiski.

⁷Mĩ nai tsumabu hatu kuxipa watã
yurabu hatu kuxipa inãkĩ mĩ hatu beshmas wayuniki,
dasibi mĩ damiwani
hatu ibuwamayukĩ hatu duawakinã.

⁸Haskakẽ dasibi hau mekekubaĩshanũbũ mĩ hatu yununiki”,
aniki. Haskabiakẽ mai hirabi damiwani hau hawẽ shanẽ ibushanũbũ
Epa Deusũ hatu yuba keyubiani yurabũ dasibi ibuwai shanẽ ibuaibu nũ
uĩriamaki. ⁹Nai tsumabu kuxipa keskama Jesus kuxipa beshmas keska
wayutã Deusũ hawẽ nui nuku uĩmakĩ Jesus tashnimatã hau dasibibuwẽ
taea mawatã bestẽnũ Deusũ yunua haska txibaĩ nuitapatã mawatã
binuniwẽ taea natiã Jesus kuxipahaira dasibibu binua hawẽ ibu dapi ma
tsauwa nũ unaiĩ.

¹⁰Deusũ dasibi damiwakinã, hawena aniki, hawẽ kuxipawenã. Haska
abuai keska dasibi hawẽ bakebu hawẽ kuxipayari hau habe hiweshanũbũ
haska xinãkĩ Deusũ hawẽ bake Jesus Cristo nuitapawakĩ dasibi menemakĩ
nukũ mekenika nuku washuniki. ¹¹Dasibibũ nũ Deus abukĩ txibaĩburã,
nukũ Epa Deus meribitũ nuku hawẽ bakebu wakĩ nuku meribi wamiski.
Haskawẽ taea hawẽ bake Jesus Cristo nukuki dakeama nuku kenakĩ: “Ë
betsabuki”, ikĩ nukukiri yuimiski. ¹²Deusũ hãtxa yuishunikatũ Deusũ
Messias tashnimashanaikiri yuikĩ:

“Ë betsabu inũ ẽ puibu anushũ

mĩ ē Deus mia kēwākĩ
 mikiri nawakĩ ē hatu unāmakubaĩshanaii”,
 iniki. ¹³Hanua kene betsa anushũ yuikĩ:
 “Eāri mĩ ē Deus ē mia ikūwākubaĩshanaii”,
 iwanā, ana yuikĩ:
 “Habu Deusũ hawē bakebu ea inātā
 ea hatu mekemanibe ē hatube nenuki”,
 iniki.

¹⁴Hatũ ibubũ hatu bake bikĩ habias nami inũ himi haya wamiski. Haska keskariai Jesus damiriatā tashninũ ika yurabũ nami inũ himi keska biniki. Haska bitā hawē hatu tenāmis kuxipa diabo Satanás haya maemakĩ binūtā hatu meshpamanũ ika hawē yurawē Jesus yurabu mawashuniki. ¹⁵Ha mawaiwē hatu haska washũkĩ habu mawaki datei hiwekubaĩmisbu dasibi Jesusũ nũ habũ ikūwaĩbu ana hawa mawaki datetima nuku washuniki, bai txakabu pewakĩ akawakinā. ¹⁶Haskawē taea txanima nai tsumabu merabewanũ ika huama hakia Abraõnē Deus ikūwāpauni keska hawē bababu merabewanũ ika Deusũ bake huniki. ¹⁷Hawē betsabu inũ hawē puibu keskatā hatũ yura bitā Deus dayashuni ha bebunua hawenabu hātxashunika binua inũ ika hawē yura Deus inai mawai hawa txítuāma pepa duapa iniki, yurabu Deus hatuki sinatamis hatu merabewakĩ hatũ txakabu buashunũ ikarā. ¹⁸Hanushũ Deusũ bake unāti wanũ ishũ Satanásā parāpanā Jesus ibubis yumākĩ binũ keyuniwē taeshũ natiā tsuabura Satanásā parāriai Deusũ bakē nuku merabewariatiruki.

Moisés pepabiakē Jesusũ binunikiaki, na hātcharā

3 ¹Nuku haska wakubainaiwē taea ē betsabu inũ ē puibuũ, nũ ikūwāshanũbũ Deusũ nuku kenakĩ katuniwē taea nũ hawenabuki. Haskakē Deusũ hawē bake hawē kuxipaya yununika wakĩ ha Deusbe nuku hātxashunika Shanē Ibu Jesus Cristo dasibi betsabu hatu binunirā, ha besti xinākubaĩkāwē. ²Deusũ nukũ shenipabu shanē ibu Moisés hawara yunua kaneama txibākĩ Deusunabu mekekubainikiaki. Hanua Jesusri katunishũ hawē daya yunua Jesusũri kaneama txibākĩ hawenabu kayabi nuku mekeriakubainikiki, Moisés binukinā. ³Hamē tsuāra hiwe bena pepawakē hawē hiwe kēwābiakĩ hawē ibu ha hiwe binumakĩ kēhairawariamisbuki. Ha keska wakĩ Deusũ Moisés kēwābianikē hawē bake Jesusũ Moisés binunikē Deusũ ha binumakĩ kēhairawakubainikiki. ⁴Ha inũ, hunibũ damiwakĩ hiwe inũ mabu wabiamisbũ hatu binukĩ nai inũ mai hirabi Deusũ hawē bakebetā damiwaniwē taeshũ yurabu hatu binua nũ unaiĩ. ⁵Hamē dasibi Deusũ ani txipu nũ nĩkashanai Deusũ enabu hawē hātcha Moisés hatu yuishuni txibābianirā, hawē tsuma besti iniki. ⁶Hakia Cristorā, txanima hawē bake kayabitũ Deusunabu mekei

Deusbe hatu hãtxashuni kaneismaki. Haskakẽ Cristo ikũwãkĩ txibãkĩ xinã betsa wama nũ mestõtã benimakĩ nũ manaiibu Jesusũ nuku benubainama ishanikiki.

Deusũ enaburã, Deus anu huĩrukũti hayakiaki, na hãtxarã

7 Haskawẽ taeshũ Deusũ Yushĩ Papatũ hawẽ hãtxa yuishunai txanimani matu ana xinãmakĩ yuinũ nĩkakãwẽ.

“Natiã Deusũ hãtxa matũ mã nĩkaiburã,

8 matũ huĩti kuxiyamakãwẽ,

nukũ shenipabu hanu tsua hiweabumanushũ

Deus nĩkama danãkĩ unãti wamakĩ sinatamanibu keskakinã.

9 Ha inũ, hanu tsua hiweabumanushũ

ẽ kuxipawẽ hatu e imakĩ

unãmati dami 40 ano ẽ hatu ima atãbiranai uĩbiakĩ

ẽ hãtxa nĩkama ea unãti wakĩ

matũ shenipabũ ea sinatamakubaunibuki.

10 Ha yurabũ ea haska waibu hatuki sinatakĩ hatu yuikĩ:

‘Ë xinã abukĩ unãti wakatsi ikama danãkĩ

hatũ huĩti peparibumã hatũmebi benui mapuabuki’, iki

11 haskawẽ taea hatukiri yubai:

‘Ë hatuki sinataiwẽ taea

hanu mai pakea pepa ẽ hatu yubabiani anu hau

hikiyamashanũbũwẽ’ ”,

ika Deus yubakaniki.

12 Haskawẽ taea ẽ betsabu inũ ẽ puibuũ, matũ huĩtinĩ txakabu xinãkĩ ana ikũwãti kuxiwama txõtũtã Hamebi Hiwemis Deus henebaĩkatsi ikama matu tibi ibubis mekekĩ xinã pewartikubaĩkãwẽ. 13 Haskama matuburã, haska Deusũ hãtxa natiã txaniaya natiã besti matũ xinã mã hawaira pewatirubuki. Haskawẽ taea manama benimarabe bestinãkãwẽ, bari tibirã, hau tsuã taska betsa matu parãyamanũbũ inũ txakabũ matu meshta txĩtuĩ matũ huĩti mã kuxiyamanũbunã. 14 Cristobe hiwekatsis ikĩ hawẽ kakape nĩkatã nũ ikũwãkĩ taewanirã, betsa wama habiaskas hakiri xinãkubainãkãwẽ.

15 Deusũ hãtxa hawẽ Yushĩnĩ matu yuikĩ:

“Natiã Deusũ hãtxa matũ mã nĩkairã,

matũ huĩti kuxiyamakãwẽ,

matũ shenipabu hanu tsua hiweabumanushũ

Deus nĩkama danãkĩ unãti wakĩ sinatamanibu keskakinã”,

iniki.

16 Tsuabũ animẽ, Deusũ hui nĩkabiãtã txipu sinatamakinã? Habu Moisés Egito mai anua dasibi hatu pashawanibu habũ anibuki.

Xinaĩrakãwẽ. 17 Tsuabuki inimẽ, 40 ano Deus hatuki sinatairã? Hanu

tsua hiweabumanushū Deus nīkama hatū txakabuwē hatu kupia mawakubirākī imanibuki. ¹⁸Ha mae pepa Canaã anu Deusū hatu yubai hatukiri hātchai: “Ē hatu hanu hikimatā hatu huīrukūmamashanairā, habuā ē hātcha nīkama danaiburā, habu hikiama ishākanikiki”, iniki. ¹⁹Txanima Deusū hātcha ikūwākī txibākatsi ikama habu hikiabuma inibu haska hatukiri nū unai.

4 ¹Ha haskanibukiri natiā nū yuikubainairā, hawē mae pepa haska Deus yubakani hanu huīrukuī hikikatsi iki nū ikaiburā, haska keskariki. Uīrakāwē. Betsabū matū xinā mā betsa wamakē haskawē taea mā hikitirumariki. ²Txanimaki. Matū shenipabu hawē yubati hātcha Deusū Moisés hatu yuimani keska wakī hawē kakape hātcha huīrukūti betsakiri Jesusū hawē tsumabu unāmatā hatu nukuri yuīmani nū nīkariakubainai. Nū hatu keskatirumaki. Uīrakubainākāwē. Haskai nukū shenipabū hawē yuba hātcha huīrukūtikiri nīkabiai ikūwāma inū hawa txibāma ikubainaibuwē taeshū hawē mai pepa yubani anu hau hikiyamashanūbū hatu yubanitū hatu nemaniki. ³Tsuabūra nū ikūwaību Deusū huīrukūti pepa anu nū hikitirubuki. Hakia tsuabura nukubetā ikūwābumarā, hawa hikitirubumahairaki.

“Ē hatuki sinataiwē taea

hanu ē huīrukūti pepa ē hatu yubabiani anu
hau hikiyamashanūbūwē”,

ika Deus yubakakī yuini xinākāwē. Deus haska yubakabiani mai hirabi damiwatanā, huīrukūti pepa ma pewani hayaki, hanu ikūwaību nū hikitiruburā. ⁴Haska Deus dayani Moisés hawē hātcha keneni sétimo diakiri yuikī:

“Dasibi damiwakī hawē daya keyutā
sétimo dia Deus huīrukuniki”,

hatu watā keneniki. ⁵Kene betsa anu hanu hawē huīrukūti anu yurabu hikitiru kasmai hikitirumamēkaī, hawa hawē hātcha nīkaisbumawē taea hatuki sinatai yubakai:

“Hanu ē huīrukūti pepa ē hatu yubabiani anu hau
hikiyamashanūbūwē”,

ika Deus hātchaniki. ⁶Habu dukū nukū shenipabū hawē hātcha pepa nīkariatā danaī mai pepa huīrukūti anu hikiama inibuki. Hakia betsabu hikinibuki. Natiā ha yubani hātcharā, betsa wariamaki. Haskawē taea ha huīrukūti pepa anu tsuabūra ikūwaī nū hikishanai. ⁷Hakia hawē hātcha danaību yuini keska wakī Deusū yurabu xinā betsa wamakatsis ikī hanu shaba betsa pewartiā haska hātcha tashnimanūbariai pewakī ana hātchaniki. Bari itxapa katā anūbariaikiri bebūkiri nukū shenipabu shanē ibu Davi hakiri nawamakī yuimakī:

“Natiā matū mā Deusū hātcha nīkairā,
matū huīti kuxiyamakāwē”,

akī hātxamai ikūwāshanaibu dasibibukiri Deus hatu yubakashuniki. ⁸Ha inū, hawē hātxa danānibū bakebu mai pepa anu Josuē hatu iyushū hanu huīrukūti kayabi hatu ibuwamaya hanu huīrukūti betsakiri Deus yubakai ana hātxama ikeaniki. ⁹Haskawē taea hawē huīrukūti pepa naiuri nū Deus ikūwaību meribi nū hawenabu hikishanaibu hayayuakiaki. ¹⁰Ha inū, Deusū huīrukūti pepa anu tsuabura ma hikia ana dayama Deusbe huīrukūpakeshānikiki, damiwakī keyutā Deus huīrukuni keskairā. ¹¹Haskawē taea hawē huīrukūti pepa anu hikishanū ika nukū merabenā Jesus txibaī yumābiai txītūtaskayamanākāwē, ha habū hawē hātxa nīkama nukū shenipabū danānibu keskakī hatu tanaī hatu txibāyamanākāwē.

¹²Ha Deusū hātxa kaīkinā, paepa hiwea keskatū nukū xinā pewakī huni hawē nupe kenu dabeyatū huīti uke merā txapashū uā keska wakī nukū xinā inū nukū yushī unāti wamiski. ¹³Dasibi Deusū hatu damiwanirā, unāti waya tsuā hani hūtaī hunetirubumaki. Dasibi nukū akarā, hirabi nuku unāti washanikiki, nukuki kenemis bepētā manakukī pewakinā.

Jesus Deusbe nukū hātxashunika binua kayabikiaki, na hātxarā

¹⁴Deusū bake Jesus iwāni ana hawēri naiuri kani hawē Epabe nuku hātxashunika binua nū ikūwaīwē taeshū nukū xināwē mestēwātā txibākī heneyamakubainākāwē. ¹⁵Haska hiwea bika tenei nū yumākūkaīmis keskai nukū Deusbe nuku hātxashunika binua na mai anua hiweria nuku itsai hamapai tibi mei bika teneriai yumākūkainiki. Haskabiai hawa txakabu mekī kaneama iniki. ¹⁶Haskakē hawara mei nū bika teneaitiā hau nuku merabewanū Deusū kuxipa xinākī haki dateama ikūwaī haki txanikī ea akubainākāwē, hau nukū Epa Deus nuikipatū nukuwē dabanā ikī hawē duapawē nū nuitapai hau nuku merabewanunā.

5 ¹Haska inū, hawenabu txakabukubaīmisbuwē taea Deus hatuki sinatai habuā hatu daewashūkī merabewakī txashuwā tesēshū hau hatu kua keyupakeshūshanūbū dasibi Deusbe hawenabu hātxashunika shanē ibu tibi hunibu anua Deusū katumiski, Moisés betsa Arāo katuni keska wakinā. ²Hamē yura betsa imis keskai Deusbe judeubu hātxashunika shanē ibu tibitū ibubis mekei peama kanemisbuwē taea haska xinaī hatuwē nuiriaturubuki, unāriabuma inū txakabuwakī kaneaiibuwenā. ³Ha inū, hawē txakabuwē inū nukunabū txakabuwē taea Deus sinatai Deusbe nukunabu hātxashunika shanē ibu tibitū Deusū yununi txibākī Templo hemaīti anushū yuinaka hatu menu keyushūkī Deus hatu daewashūpakemisbuki. ⁴Ha inū, tsuāra ibubis eiskaū xinaī: “Deusbe enabu hātxashunika shanē ibunū”, ika hamebi katukutirubumaki. Hakia Deusū Arāo katuni keska wakī tsuara katukatsis ikī duawakī hatū besti hatu kenakī katukubaīmiski.

⁵Habiaskari wakī Cristo ibubis katukui nuku hātxashunika binua ibubis ikama iniki. Hakia Deusū duawakī yuikī:

“Mī ē bakerā, natiā ē hiwea mia inākī ē mia yunuaii”,
aniki. ⁶Hanushū hawē kene betsa anushūri yuikī:

“Miarā, minabu ebe hātxashunika niti ikama mī ipakeshanai,
Melquisedeque ipauni keskairā”,
aniki.

⁷Ha inū, nenu mai anu yurabube Cristo hiweyua mawawē dateyamanū ika yumaī saī iki kashai hawē Epa Deusū merabewatiru xinaī habe hātxakī hau hawē date yushī nemashunū hawē kuxipa ea aniki. Hawē Epā hātxa nīkakī danaismawē taeshū Epa Deusū haska wai nīkatā hawē date nemashuniki. ⁸Ha inū, Deusū bakebiatū hawara bika tenekī nīkakī txibāhairanū itā hamapai xarabu haska Deusū abumis Cristō nīkahairai ishūkūkainiki. ⁹Haskai pepakūkaini hawē besti hiwekuīa bi nū hawē pashatirubu nuku ishuī ha besti bai ikibi iniki, nū habū ikūwākī txibāshanaibu nuku ishuīnā. ¹⁰Hawē bake haska yubani keska watā Melquisedeque keskari wakī hawenabu Deusbe hātxashunika shanē ibu binua hau niti ikama ipakeshanū Deusū ha uīkī katunishū yununiki.

Jesus ikūwābiatā henetimakiri hatu yununikiaki, na hātxarā

¹¹Haskai Deusbe Jesus nuku hātxashūmiskiri itxapa ē ana matu yuitirubia mā unāshubira tapiāiwē taea ē matu yusīāi bikahairaki. ¹²Ha inū, bari itxapa ikūwābiakubaini mā yusīnanāriamaki. Hakia natiā yusīa betsa betsapa Deuskiri hau tsuabūra unāshubira matu meshtāmabaikī ana yusī pewanūbūwē. Hamē ha dukū hawaira abukī ikūwākī mā tapīnibuki. Hakia natiā mā ma punu nukai babuhairai. Hanū piti kuxipa pinū ika keskama mā bakeixtā txutxu heneriama keskabuki. ¹³Ha inū, bakeixtā txutxu besti amis keskaburā, tsuāra haska nukū Shanē Ibū abuai tapiāma mā kanekubainai. ¹⁴Hakia yura ewabū piti kuxipa pimisbu keskabū habuā besti hawara pepa inū hawara txakabu unāti wakī Deusū hātxa pepa unākī katutirubuki.

6 ¹Haska tapīkubaini ewairā, nū yura ewa keska itirubukiaki. Haska bebūkiri Cristokiri matu yusīkī taewanibu haskakiri nū ana hawētxaīs txītuābirābirākī nū matu yusītirumaki. Eska tibikirirā, ikūwāriabuma hatu ikūwāmatikirirā, hawara txakabu betsa betsapa aki hawē taea mawa kayabi anu bumisbu hatu putamakī yusīakirirā, haska wakī Deus txibākī ikūwātikirirā, ²hatu naximakatsi hatu yusīakirirā, habū Cristo ikūwaībuki mapepishū hatu Deus yukashūtikirirā, mawabu ana bestēshanaibukirirā, Deusū hatu unāti watā hanu hatu bika tenemapakeshanaikiri haskas yusīawē besti nū matu yusītirumaki. ³Hakia ikūwaī haska tibiwē nū ewakī nū anūbū Deusū nuku merabewaya haskai Jesuski nū txiti ipakenūbū ana matu yuinū nīkakāwē.

4-6 Tsuabura Deusū hawenabu wakatsi hatu katushū hawē Yushī Pepa hatu inākī hatu merabewamapakeaya hawē hātxa pepa unaī Jesus ana huaitiā haskasnūbariai keskai hiwei taekī habū Jesus ikūwākī txibābiai putai txītūtā hatūmebi ana xinā betsa watirubumaki. Habu Deusū bakē hātškaki kashekī danākī ana cruzki masta keska wakī hatunaburi Jesuski kashemaibuwē taeshū hatu yusīkī nukūri hatū xinā hatu betsa wamakī nū hatu pewatirumaki. 7Ha inū, mai pepa anu ui imakī yurabū yunu banaimabu maī yume pewai hanu Deusū hatu manakumiski. 8Hakia mai betsa anu Deusū ui imabia yurabū yunu banaimabu maī yumewama txaka inū musha bestikē ha mai txakabu Deusū danākī yupumisshū hawē henekī kuashanikiki. Jesus ikūwākī henetā Deus dayashūtškakaiburā, ha mai keskabuki.

9Ē betsabu inū ē puibuū, haskakiri ē matu hātshawabaiirā, matukiri ē xinānā, bai pepaki nukutā mā hawa txītūtirubuma mā ma mestēwātā pashani ē xinaiī. 10Ha inū, Jesus ikūwaību betsabu merabewai hatuwē nuikī abukī mā Deus abukī Deusū haska abuai akī mā benimawamiswē taeshū hawa kanema matū peparī hakimama matu duawakī matu hawa danāma iriashanikiki, haska natiā mā ariakubainaibuwenā. 11Haska matu tibitū xinākī mā akairā, betsabu uīmakī heneama xinā txākākī hawara pepa mā uīkatsis ikai heneama menekī akubaīkāwē, haska Deus yubakani heneama manakinā. 12Ha inū, Jesus txibaī txikixi hau mā punu nukayamanūbū Jesus ikūwākubaīkī hawē unānuma hiweti Deus yubakani bikubainaibu keska wakī hatu txibākī pepa besti wakubaīkāwē, hanu mā mawaitianā.

Deus yubakai hawē unātinani betsa waismakiaki, na hātšarā

13Hanushū matū shenipabu Abraão Deusū yubakatsi ikī tsuā Deusū kuxipa binua datā atiruma Deus ibubis datā ikī yubakakī 14Abraão yuikī: “Txanima eā mia pawakī mī bababu itxapa mia washūkī ē mia duawakubaīshanaiī”, aka 15nīkatā hawē yubati hātxa manai hī hī ikama ikūkaīkī atimas haska Deusū yubani bi benimanikiaki.

16Ha inū, nukunabu yubakakatsi xinai: “Hawara ē hatube yubakai ē akamakē haratura kuxipātū hau ea haskara washanūwē”, iki tsuara kuxipaki mesei yubakamisbuki. Hanua haskakiri yubakaimawē taea ana xinā betsakī ana tsuā yuba betsa wakī maewatirumaki, hawē taea haa ikirā. 17Deus haska yubakani meneshanai hawē yubakatirā, hawa maewama tsuabūra txanima ikūwākī shabakabi bishanaibu hatu inākatsi Deus hawē bakewē txanima ashanai hakiri yubakaniki, mestēwainā. 18Haska Deus yubakamis yubanametā maewai txani txakaismawē taea hawē nukuwē nuishanai nū haki irushanūbū ha ikūwākī manakanākāwē, nuku ashūshanikikirā, hawē taea yubakaniwenā. 19Na haska ikūwākī nū manakaiburā, nukū yushī nū ma mestēwābuki, hawē shashu tsumakī

mai betāti shākama putakī mestēwākī mai pus amamisbu keska wakinā. Nukū xinā haska mestēwāwē taea Jesusū ma nuku pewashuni anu hawa dateama nukū Deus meribi anu nū kematiruki. ²⁰Nai anu haskai buaibu ha dukūtū bai wai nuku bai bepēshuni tsua bebui hikiriama ha nukū Deusbe hātxashunika binua ipakeshanai Melquisedeque dayapauni keska nuku ishuī kaniki.

**Cristorā, Melquisedeque hawenabu Deusbe
hātxashūpauni keskakiaki, na hātxarā**

7 ¹Melquisedequekiri ana matu yuinū nīkakāwē. Ha Melquisedequerā, Salém shanē ibu inū nukū Deus binuabe hawenabu hātxashunika inikiaki. Nukū shenipabu Abraão shanē ibu betsabube detenamekī hatu maematā hawara yumetsubaixinabu hatu deteshū mebītākī beaya Salém mae shanē ibu Melquisedeque kaīkaī haki nukushū Deusū Abraão hau duawapakeshanū Melquisedequeī Deus yukashunikiaki. ²Haska washunaya Abraōnē hawenabu yunua nawabū mabu mebīxina pashkakī mātxi mekē dabeti wabu Melquisedeque duawakī kēwākī mabu mātxi bestitxai Abraōnē inākuinikiaki. Hamē betsarā, Melquisedeque hawē kena maewarā, shanē ibu xinā pepaki. Ha inū, hawē kena betsa Salém shanē ibu maewarā, hawenabu unānuma hiwetanika shanē ibuki. ³Ha inū, betsarā, nukunabu Deusbe nuku hātxashunikakiri hatu unākī hatū epa inū hatū ewa inū hatū shenipabukiri unākī nū hatu tanakubaīmiski. Hakia Melquisedeque betsahairakiaki, tsuā unāmarā. Hawenabukiri tsuā unāma inū, hawē kaiyākiri tsua hakiri hātxaisma inū, mawani tsuā unāmakiaki. Hakia Deusū bake keskai hawenabu Deusbe hātxashunika ipakeriaikiaki, heneamarā.

⁴Ha inū, Melquisedeque shanē ibuhairakī nukū shenipabu Abraão shanē ibubia ha binuawē taeshū nawa shanē ibubube detenamekī maematā hatū mabu beshū mekē dabeti mātxitā Abraōnē Melquisedeque pashkashūkī mātxi bestitxai inākuinikiri ana matu yuinū nīkakāwē. ⁵Ha dukū, Abraōnē baba Levī bababu Deusbe nukunabu hātxashunikatū Moisés hatu yusīni hātxa txibākī dasibi hatunabu habias Abraōnē bababubia yura betsabu anua hatu akawakī habuā yunu mātxiābu habū dukū ha piti pashka taewashūmisbuki, mātxi betsa Levī bababu inākinā. ⁶Melquisedeque Levī babamabiatū Abraão anua hawē mabu mātxiā betsa binikiaki. Ha inū, betsarā, Deusū Abraão duawakī ma yubabianikē Melquisedeque shanē ibuhairatū nukū shenipabu Abraão beshmas merabewakī duawanikiaki. ⁷Tsuara kuxipa beshmas hau Deusū duawanū betsā binuatū Deus yukashūmisrā, haska nū unaiī. ⁸Uīkī xinākāwē. Levī bababū Deus dayashūkī hawenabu Israelbū inākuī bishūbiakubaīmisburā, debukubirāmisbuki. Hamē Melquisedequekiri keneniburā, hiwepakeaiwē taea Abraão anua inākuī bikinā, Levī

bababu binunikiaki. ⁹Na haska yuikinã, Levĩ bababu hawenabu Deusbe hãtxashunika iki kai xinãkĩ Abraãonẽ Melquisedeque inãni keska wakĩ natiã amisburã, haska Melquisedeque pakakĩ inãkinã, Abraãonẽ hanubi ibubis pakanikiaki, ha mabu mãtxĩ mekẽ dabeti watã hatiubus bestitxai inãkinã. ¹⁰Melquisedeque Abraão kawanaiki nukuni keskarã, dasibi Abraãonẽ bababu kaĩriabumabiakẽ hawẽ yura meranua habuki nukuni keska nũ xinãtiruki. Txanima Melquisedequẽ hawẽ kuxipawẽ Abraão inũ Levĩ bababu binua iniki.

Deusbe hawenabu hãtxashunika binua bena wanikiaki, na hãtxarã

¹¹Israelbu Deusũ hatu hawẽ pepawayukatsi hawẽ yunuti inũ hawẽ nemati hãtxa Moisés hatu inãmakĩ yununikiaki. Hawẽ taeshũ Levĩ bababu Deusbe hawenabu hãtxashunika wakĩ ha hãtxa txibãkĩ hau hatu pewakubaĩshanũbũ, iwanã, Deusũ Moisés habu katumanikiaki. Hatu haska waniwẽ taeshũ habuã hawa pewama kanekubaini hiwenibuki. Haskawẽ taea huni betsa Deusbe nuku hãtxashunika betsa Deus anua huniki. Hamẽ Arãonẽ bababũ amis keskama hakia Melquisedeque imis keskai Deusbe nukunabu hãtxashunika bena hau ipakeshanũ haska Deusũ xinãnishũ hawẽ yunuti maewanikiaki. ¹²Hanua Jesus Deusbe nuku hãtxashunika yunukĩ nukunabu Deusbe nuku hãtxashunikabu hatu binumakĩ hatu hamẽ waniki. Ha dikabi hawẽ yunuti inũ hawẽ nemati hãtxa betsa wakĩ Deusũ maewarianiki. ¹³⁻¹⁴Nukũ Shanẽ Ibukiri keneniburã, Israelbu shukua betsa anua tashniniki, Levĩ bababu anuamarã. Ha shukua anua hawa Deusbe hawenabu hãtxashunika hayariama iniki. Hakia Judã bababu anua nukũ Shanẽ Ibu Jesus tashninirã, dasibibũ unãkanikiki. Hamẽ Moisés Deusbe hawenabu hãtxashunikabukiri kenekinã, Judã bababu anua kaĩshanaikiri hawa hatuki txaniama iniki.

¹⁵Haska Deusbe nuku hãtxashunikakiri Deusũ hawẽ yusã maewanirã, txanima shabakabi nũ unãtirubuki, Deusbe nuku hãtxashunika betsahaira Melquisedeque keska nukũ Shanẽ Ibu nuku washunirã. ¹⁶Haska hunibu hau nukunabu Deusbe hãtxashunika binua ikũkaĩshanũ Levĩ bababu anua katumisbu keska wakĩ ha hãtxa yununi txibãkĩ nukũ Shanẽ Ibu Deusũ katuama iniki. Hakia hiwea kuxipa haya tsuã yamawatirumawẽ taea niti ikama nuku hãtxashũpakeikiki. ¹⁷Ha kaĩriamabia hau hawenabu Deusbe hãtxashunika ipakeshanũ hakiri keneniburã, eska yuiaki:

“Miarã, minabu ebe hãtxashunika niti ikama mĩ ipakeshanaii,
Melquisedeque ikũkaini keskairã”,

aniki. ¹⁸Habu dukũ katushũ Deusũ hawẽ hãtxayabi hatu yunubiani ha yunuti sheni babutũ nũ haki txiti ibia nukũ hiwea hawa nuku pepawatirumakẽ Deusũ nemakĩ beshteyuniki. Haskawẽ taeshũ Jesus nuku hãtxashunika tashnimatã hatũ daya binumaniki. ¹⁹Deusũ Moisés

yunua hawē hātxa keneni txibābiai hatū nuku pepawatirumakē hawē shātukū betsa yunukī nuku hawē yuba bena pehaira wakī ha txibaī haki dasitā Deusū enabu kayabibu nū hiweshanūbū nuku ashuniki.

**Hawenabu ini keskama Deusbe ha nuku hātxashunika
binua Jesus hiweakiaki, na hātẓarā**

²⁰Ha inū, Jesus katukinā, Deus ibubis yubakakī betsa watimawakī mestēwākī Jesus katuniki, hau nuku hātxashūpakeshanunā. Hakia Deusū hawa yubama yunukī Levī bababu katunikiaki, Deusbe hau nukunabu hātxashunika ikubainūbunā. ²¹Hamē nukū Shanē Ibu katukinā, hawē yuba kanetima waniki. Hakiri tana yubakaikiri Davi hakiri hātxakī kenekī:

“Deusū hawē bake katukī hakiri yuikī:

‘Miarā, ebe minabu hātxashunika mī ipakeshanai, niti ikamarā’,
akī yubakī Deusū ma yui hātxashu
ana hawē xinā betsa wama ishanikiki”,

akī nuku keneshuniki. ²²Ha dukū nuku yubani keskama Jesuswē hawē yubaka bena binumakī pepahaira waniki. ²³Ha inū, Moisés hātẓa txibaī Deusbe nukunabu hātxashunikabu mirimabu dayabiai betsa taska tsua hiwei ikibi ikama dasibibu mawakubaīmisbuki. ²⁴Hakia Jesus ana mawatirumawē taea ha besti Deusbe nuku hātxashūkūkainaya betsā haska washū hawē daya mebītirumaki. ²⁵Tsuabūra Jesus ikūwai hawē Epa Deuski dasia Deusū kupiti binui pashaibu hiwekuīa inākī hatu merabewai Deusbe nuku hātxashūpakeikiki, hawa niti ikamarā.

²⁶Hanua Jesus Deusbe nuku hātxashunika binua nū haska keskariai hiwetiru ha hawa txakabu hayama inū hawa detsis hayama meribi pepa besti haska yurabu txakabukī Deus sinatamamisbu keskama pepakī keyu hatu binutā naiuri pepahairai hauri nuku hiwei kashuniki. ²⁷Ha nukunabu Deusbe nuku hātxashunikabu binuabunā, shaba tibi yuinaka betsa tenātā hatu kuakī menu keyushūmisbuki, ha dukū hatū txakabu dukū buatā ha katxu hatunabū txakaburi buashūkinā. Hamē Jesusrā, hatu keskamaki. Hatū nukū txakabu Deus buamai hawē hiwea yauxiama cruz anua besti wai hawē hiweawē nuku mawashūkī ana mawatimai ibubis Deus nuku daewashuniki. ²⁸Ha inū, Deusū Moisés yusīni hātẓa txibaī pepakatsi ibiai Deusbe hatunabu hātxashunikabū kanemisbuki. Hanushū Deusū hawē yunuti inū hawē nemati yunu keyunishū hawē bake yubakī katukī nukunabu Deusbe hātxashunika binua pepahaira hau ipakeshanū hakiri yubakatā katuniki.

Deusū Jesuswē yuba bena pehaira wanikiaki, na hātẓarā

8 ¹Nū haska hakiri hātẓairā, nuku Deusbe hātxashunika binua nū ha xinā kaya wairā, nai anu hawē ibu Deusū tsauti yusiuri nuku

tsaushunaki. ²Hanu Deus hiwea anua Deusbe nuku habi hãtxashunika kayabi hawē daya akirã, haska hatu yusĩmaniwē taeshũ hatũ yusã nũ ikũwaiĩ. Txanima Deusbe nuku hãtxashũmistũ hatu dasibi binutã hanushũ tsuã ana itxakawatima anu Deusbe shanē ibukĩ hanu Deuski nukuti kayabi Deusũ besti ani anushũ nuku inũ hawē Epa Deus daewakĩ nuku haibunamemaikiki, ana sinatamamarã, hunibũ Templo wama ini anushunã. ³Ha inũ, Deusbe hawenabu hãtxashunika tibirã, Deusũ hatu katukubaĩmiski, hau habũ hatu merabewakĩ hawē Deus daewati uinaka inãkuĩaĩbu hau habũ kuashũkubainũbunã. Hakia Jesus Cristo nuku hãtxashunika inũ ikarã, hawē yurawē hawē hiwea yauxiama hawē Ibu Deus nuku daewashunũ ika nuku mawashuniki. ⁴Hamē nenu mai anushũ Deusũ hãtxa Moisés yusĩni txibãkĩ Deusbe nukunabu hãtxashunikabũ txashuwã bake inũ ina awa tesēshũ kuakĩ ma hatu menu keyushũkubaĩmisbuwē taearã, nukũ Shanē Ibu Jesusrã, hania Deusbe nuku hãtxashũtiruma ikeanaĩ. ⁵Ha inũ, haska Mati Sinai anushũ Deusũ nai anua tari inũ bitxi hiwe dami Moisés uĩmaxina Moisés hatu amanũ ikaya hanushũ Deusũ Moisés ana yuikĩ:

“Uĩrawe. Haska mati anushũ ẽ mia uĩmaxina keska ha itsa hatu amashãwē”,

aniwē taeshũ Deusũ Moisés uĩmani ha kayabima ha itsa uĩmani keska ha Israelbu hawenabu Deusbe hãtxashunikabũ txibãkĩ akubaĩmisbuki. ⁶Hakia Cristo nuku hãtxashunika kayabirã, ha hawē Epabe nuku hãtxashũkĩ nukukiriri xinaĩ nukuwē dabanã Deus hakiri yuba bena pehaira ana tsuã betsa watima waniki, hawē taeshũ hawa kanetima txanima yuba mestẽwãkinã.

**Ha dukũ Deusũ yubani yamawai kai ana bena
yubashanaikiri hãtxanikiaki, na hãtxarã**

⁷Hanua ha dukũ yubani pepahairakē hawē yubati hãtxa ha katxu Deusũ ana yubama ikeaniki. ⁸Hakia ha yurabu Deusũ uĩa hawa hawē yunuti pe txibãbumakē hanushũ hatukiri hawē yuishunika Deusũ Jeremias yuikĩ:

“Deusũ yuikĩ: Hawatiãra Israelbu inũ
Israelĩ bake betsa Judã bababube
ẽ hatube yubakai benashanaĩ.

⁹Na haskakiri hatube yubakairã,
ha baritiã hatũ shenipabu Egito mai pakea anu hiweabu
ẽ kuxipawē ẽ hatu tsekabirãkĩ iweni keska
ha xinãwē ẽ hatu ani keska ẽ wama ishanaii.
Ë habu hatu yubani ea txibãkĩ pewabumawē taeshũ
ẽ ma hatu heneaki, iniki, Shanē Ibu Deusrã.

¹⁰Hamē hanu hatiara Israelĩ bababukiri ẽ ana hatukiri yubakairã,

eska ē ishanaii.

Hatiara haska ē hatube yubakai benairā,

ana bemakis ē hātxa ē hatu yunuamaki.

Hanua hanu hatuki dasikatsi hatū bushka anu ē hātxa mistukī

hatū huīti bena watā ē hātxa hatuki kenea keska ē washanaii.

Hanushū habū mekenika Deus ea ē ikaya

habu enabu bena meribi kayabi ikubaishākanikiki.

11 Hatiā ē hatu haska wakē

ē hatū mekenā Deus dasibibū unāshākanikiki,

shanē ibuhairabu inū hawaumabūrīrā.

Dasibi habū ma ibubis ea unā keyuaibū

tsuabūra hawē haibuaibu inū hawē betsabu ekiri hatu xināma

ishākanikiki.

12 Hatū txakabu hatu buashūtā

ē ana haska hatukiri xināma ikūkaishanaii”,

aka hawenabu yusitā Jeremiasī nukuri keneshuniki. 13 Hanua hawē

yubati hātxa benakiri Deusū Jeremias hātxa watā xinaī: “Ha dukū ē

yubati hātxa sheni ē anirā, ana ikama ishanikiki”, ikī ana atimawakī

xinākī: “Bena ē yunuaya ha dukū ē yununi shenikūkaini yamai kaikiki”,

iwanā, Deusū xināniki.

Deus daewati pe beshmaskiri Deusū Moisés yunua hatu amayunikiaki, na hātstarā

9 ¹Haska inū, Deusū Moisés ha dukū yubakī yunukinā, na mai anu ha hiwe merāshū haska wakī Deus kēwākī daewakubaītirubu hatu amaniki, haska wakubiranibu inū natiā nuku ashūmisburā. ²Hanu haki Deuski nukuti tari hiwe wanibukiri ana matu xināmanū nīkakāwē. Ha dukū tari hiwe nakētā tari pūtenibu anurā, hanu hawē mabu betsa ha dukū taeaki, hawē txi ketī inū haki misi mātxīti tapu meribi hanu misi mania Deus kuashūti hayaki, hawē kenarā: “Meribi dītuki”, anibukiaki. ³Hanua ha katxu tariwē pakea betsa unuri ha shaba dītu betsarā, hawē kenarā: “Hanu Deuski nukuti meribihaira dītuki”, anibukiaki. ⁴Ha dītu meranā, habianushūri hakishū inīti kuati ouro mane txi tapu fogāo hayaniki. Ha inū, hawē Deusū yubani hātxa aruti bau meribihaira ouro haswē dasibi bepukī keyua hayanikiaki. Ha merā ouro mane xumuki hanu tsua hiweabumanushū Deusū hatu inākī hatu pimapauni maná duru inū, Arāonē mestēti dami hukuī huani hi inū, mixki ture sapa dabeki Deusū yunuti inū hawē nemati 10 hātxa keneni hati hayanikiaki. ⁵Hanua hawē unāmati aruti bau mamaki Deusū kuxipa unāmati nai tsuma itsa dami dabe besū dabetā hawē peiwē hawē hatuwē nuiti bau beputi atximanibukiaki. Deus kēwāti mabukiri hatis ē matu yusīyuaii.

⁶Hanushū hawē Deus kēwāti mabu haska pewatā Deus kēwāi shaba tibi hanu dukū meribi dītu besti anu Deusbe nukunabu hātshashunikabu

hikipaunibukiaki, kēwākī Deus yuinaka menushūkinā. ⁷Hakia ha katxu meribihaira dītu anu ano tibi shaba bestitxaitiā bestiwai Deusbe nukunabu hātxashunika shanē ibu binua besti hikikī ibubis kaneriamiswē taeshū yuinaka himi bushū hawē nuiti bau beputiki himi baxa baxa akī Deus daewayupaunibukiaki, hawē txakabu inū hawenabū txakabu Deus hakimawakī hau ana hatukiri haska xināyamakubainunā. ⁸Na haska wakubainiburā, natiā Deusū Yushī Papatū ha haska wakubiranibu keska shabakāshū kēwākubiranibu nuku unāmaikiki. Habiaskariai ha bai txibaī Deuski nukuti meribihaira anu tsua hikiamā ipaunibuki, Jesus Cristō nuku bepēshūriamawē taearā. ⁹Ha inū, hanu Deuski nukuti tari hiwe anushū hawē daewati beshū inābu hatu kuashūkī keyubiakē tsuā xinā pewakī keyuama ipaunibuki. Haska wakinā, hawē nū unātirubu apaunibuki. ¹⁰Ha inū, hawē yubati hātxa bena Deusū yuiriamā haska wakī hau pishanūbū inū, haska wakī hau nushushanūbū inū, haskai pepai hau datxukishanūbū yusīkī hatū yura bestikiri Deusū hatu yununi hawē hatu merabewayuniki. Hakia natiā na habias hātxa txibākī tsuā ibubis hatū xinā mekekī pewatirubumaki.

Deus daewati pehaira Cristo inikiaki, na hātstarā

¹¹Hakia Cristo na mai anu ma iwānikī. Eskatiā harā, nukū Shanē Ibu Deusbe nuku hātxashunika binuhaira haska Deusū yuba bena nuku ināniwē nuku mekekubainikiki. Hanu Cristo hikinirā, na mai anushū hunibū hiwe wani keska anu hikiamā hakia haskarara ma hari Deusū pewashuni anu hikitā haria nuku Deusbe hātxashuni hawa apaunibu keska wama hatu binua pehaira kaneisma nuku ishūkūkainikiki. ¹²Cristo ma nuku hikishūtanā, hatū nuku yuinaka himiwē Deus daewashunū ika ikama iniki. Hakia nukū txakabuwē taea nuku mawashuni besti wai ana mawatimai hawē himi habakī hau Deusū nukū txakabu buashūtā nuku kupiyamashanū Deus bebū hikitā nuku daewashuniki, hawē hiwepaketi pe nuku washūkinā. ¹³Txanima Deusbe nukunabu hātxashunika dayakī ina awa bene inū txashuwā himi baxa baxa akī inū ina awa bake yushā menua hawē mapu ūpashki mutsashū ha mapu pae watā hatuki baxa baxa ariakī tsabūra txakabu waxina hawē txakabu tushkuakī ana hawenabubētā tari inū bitxi hiwe inū txipu Templo anushū ana Deus kēwātiru wakī hatu pewakubaikanikiki, bemakis besti wakinā. ¹⁴Haska wapaunibu pebia haska binumakī Cristō hawē himi habanirā, kuxipa paehairaki. Haskakē Deusū Yushī niti ismatū merabewayā inākuīti hawa txakabu hayama keskakī Jesus Cristo ma ana bestēkī Deus nuku daewashuniki. Mawai hawē himi habaniwē taea natiā nukū xinā txakabū nuku kanemakī hawē nuku tenāmis nuku buashūtā nukū kupiti bitā hiwekuīa nuku inākī pewaniki, Hamebi Hiwemis Deus besti duawai ha dayashuni nū hiweshūkubaīshanūbunā.

Natiã Jesus Cristowê taea yuba bena nũ hayakiaki, na hãtxarã

¹⁵Tsuabura Deusũ hatu katunibu habũ hiwekuĩa ikibi ika bishanaibu Deusũ hatu yubani haska Jesus Cristõ pewanũ ika dasibibu mawashũtã unuri Deuski inũ yurabuki hãtxashunikai dasitã, haskatã Deusũ yuba bena pewakĩ hawẽ taeshũ nukũ txakabu nuku buashuniki, ha dukũ yubani hãtxa txibãma nũ kanei nũ txakabukubaĩmisbu nuku pewairã. ¹⁶⁻¹⁷Haska inũ, hawẽ mabu pashkakĩ hawenabũ hau ibu washanũbũ yura mawariama ibubis hawenabuki tanakĩ hãtxawẽ kasmai kenewẽ amisbuki. Hakia ha mawariamakẽ hawẽ yubaka hãtxa txibãki hawẽ mabu ibu watirubumaki. Hakia ma mawakẽ haska bebũkiri yubakaima ibu watirubuki. Haska keskai Jesus nuku mawashũtã ana besteniwẽ taea haska Deusũ nuku yubani nũ ma hayaki. ¹⁸Ikũki. Deusũ ha dukũ yubanirã, yuinaka ina teseã himiwẽ hawẽ dukũ hatu unãmati taewamakĩ hatu yununiki. ¹⁹Haska inũ, Deusũ yunuti hãtxa tibi inũ hawẽ nemati hãtxa tibi Moisés hawenabu dasibi yusishũ hatu keneshũtã, txipu txashuwã dani taxipa wa ni peiyabi tsumashũ ina awa bake himi inũ ũpash neshua pukutãtãkĩ Deusũ hãtxa una baxatã hawenabu baxa baxa akĩ ²⁰hatu yuikĩ: “Matu yuinũ nĩkakãwẽ. Na hãtxa ẽ matu yuishuwẽ Deusũ matu ma yubashuki. Ha inũ, na himirã, hawẽ Deusũ matu yubashu xinãmati himiki”, atã ²¹Moisés hatu haska watã habiaskari wakĩ meribi wakĩ hanu Deuski nukuti tari hiwe inũ haki Deus kãwãti mabu dasibiki Moisés ina awa bake himi baxa baxa akĩ keyunikiaki. ²²Deusũ Moisés hawẽ hãtxa yununiwẽ taearã, mabu inũ tsuabura Deusuna wakĩ hatu meribi wakinã, himi habama hatũ txakabu buatiruma inikiaki. Hakia Deusunabu meribi hatu wakinã, hatũ txakabu buashũkĩ himi habai bestiwẽ atiwakĩ yununiki, Moisésnã. ²³Haskawẽ taeshũ txanima himiuma tsua meribi itirumawẽ taeshũ yuinaka mirima detekubaĩpaunibuki, hatũ txakabu ana Deusũ xinãtima wamakinã. Hakia haska wakinã, haska txipu Jesus Cristõ nukũ txakabu nuku buashũshanai ha binumakĩ ha kayabima mawakĩ ha keska wakĩ akubainibuki.

**Habũ ikũwãshanaibũ txakabu buanũ ika Cristo
nuku mawashunikiaki, na hãtxarã**

²⁴Hanua hanu Deuski nukuti tari hiwe hunibũ na mai anushũ anibu anu Jesus Cristo hikiama, hakia nai anu hanu Deuski nukuti kayabi anu hikinishũ Deus bebunua natiã nuku hãtxashũkĩ Jesus Cristõ nuku ea ashuĩkiki. ²⁵Ha inũ, Arãonẽ bababu Deusbe nukunabu hãtxashunika shanẽ ibu binua ano tibi dayairã, himi betsabu bui hikitã Deus inãkĩ Deus uĩmai hanu meribihaira anu hikipaunibu keskai Cristõ hawẽ himi bushũ inãkĩ baxa baxa akubaĩtima iniki. ²⁶Cristo haskatianirã, mai damiwakĩ taewaitiã nukũ txakabu buanũ ika mawani nuku mawashũpakei heneama

ikeanai. Hakia bari hawē heneaitiā haska Epa Deus hakiri yubakani natiā hawē hātxa txibākī nukū txakabu nuku buashuni mawakī hawē yura hawē ibu nuku ināshūkī nukū txakabu buashunū ika Cristo bestiwai tashnitā mawaniki. ²⁷Yurabu dasibi besti wai mawamiskē hanushū txipu Deusū hatu unāti washanikiki. ²⁸Ha inū, Cristo haska keskariai hawē hiweawē besti wai mawariakī Deus nuku ināshūkī nū habū ikūwāshanaibū itxapabū txakabu nuku buashuniki. Txipu ana ha katxu Cristo huirā, ana txakabu pewatanū ika huama hakia nū habū manaka bestiabu nuku pasha watā mekenū ika ana hushanikiki.

**Deusū Moisés hawē hātxa yununirā, ana hawē
hatu pewatirubumakiaki, na hātjarā**

10 ¹Hanua Deusū hatu yubani Moisés hatu yusīpauni hawē yubati bena haska hawē besu tashnimashanai hawē bemakia unāmati besti iniki, haskaira mawaira kuxipa ha kayabimarā. Haskakē Deusū hātxa Moisés yusīniwenā, tsuabura dasibi pepatirumawē taea bari tibi habias daya txashuwā bene inū ina awa bene tesēshū kuakī keyushūpakebiakī Deusbe nukunabu hātshashunika shanē ibu binuatū nukunabū hatū xinā hatu betsa wamakī dasibi hatu pewakī keyushūtirubuma ikubiranibuki. ²Txanima Deusū hātxa kuxipa hayatū hatū txakabu ma pewakē habū xinā ibubis ma pe mekinā, ha yuinaka menukī Deus inākubainaiburā, henekeanibuki. ³Bari tibi txashuwā inū ina awa tesēshū hatu kuashūkī Deusbe nukunabu hātshashunika shanē ibu binuatū hatū txakabu ana hatu xināmakubaīmiski. ⁴Hakia yuinaka mawa himiwē hatū xinā txakabu pewakī hatu buashūtirubumaki.

Jesus Cristo mawakī Deus nuku ma daewashunikiaki, na hātjarā

⁵Haskakē Jesus Cristo mai anu dami tashnimashū yurabu yusīkī taewakatsi hawē Epa Deus yuikī:

“Epaā, yuinaka inū shekiwā duru kuaibu besti mī ana abuamaki.

Haskakē mī xināwē ē akubaīshanū huni kuī yura mī ea ināniki.

⁶Ha inū, hatū txakabu buakatsi ikī inākuī bushū hatū txakabu buashūkī hatu kuashunaibu mī ana haska abuamaki.

⁷Haskakē eska unātā haska ekiri keneniburā, mī xinānē besti anū ika ē ma tashniaki”,

aniki. ⁸Ha dukunā, Deusū Moisés hatu yusīmani keska abiakī kaneaiuwē taeshū Deusū hatū inākuī inū hatū txakabu buashūkī hatu menu keyushūbiakubainaibū Deusū ana abuama inū benimama ikūkainaya ⁹Jesus hushū yuikī: “Haska mī xinānē besti anū ika ē ma

tashniaki”, ikĩ hawẽ Deus daewati sheni hawama wakĩ keyutã hawẽ Deus daewati bena hamebi hawẽ hiweawẽ nuku bena washuniki. ¹⁰Hanua Deusũ xinã besti txibaĩ bestiwai hawẽ yura Deus inaĩ nuku mawashũtã ana besteniki, ana betsatiã mawatimairã. Haska wakĩ Jesus Cristõ Deusunabu nuku wakĩ ma nuku meribi waniki.

¹¹Haska inũ, hatũ txakabu hatu buashunũ, iwanã, inãkuĩ betsa betsapa Deus inãkĩ habias bestikima yuinaka kuai bikamisbuki, haskawẽ hatũ txakabu tere akĩ keyutirubumabia Deuski nukuti Templo hemaĩti anu dayakĩ bari tibi nukunabu Deusbe hãtxashunikabũ habiawẽs daewati wakubaĩmisbuki. ¹²Hamẽ Jesus Cristo ikirã, habũ nũ ikũwãshanaibu nukũ txakabu nuku buashunũ ika besti ha bestiwai cruzkia nuku mawashũtã ana ipatimai bestõtã hawẽ Ibu Deusũ yusiuri hanushũ betsabu binũa besti natiã ma tsauwaki, hanua nuku hãtxashũkũkainirã. ¹³Harishũ tsuabũra Cristo danaĩ haki sinataibu Deusũ hatu maemamakĩ hawauma hatu washanai manayui Jesus Cristo tsauwaki. ¹⁴Jesus Cristõ hawẽ hiwea besti wakĩ Deus inãkĩ ma dasibi pehairawai mawaniwẽ taea tsuabura Deusũ ma hatu pewani ma meribi hiweshũkanikiki. ¹⁵Deusũ Yushĩ Papatũ betsa watimawakĩ hawẽ yuishunika Jeremias yuikĩ yubai:

¹⁶ “Ë Yavẽ Deusũ hatu yuikĩ:

‘Hanu hatiara Israelbukiri ã ana hatukiri yubakairã, eska ã ishanaii.

Hatiara haska ã hatube yubakai benairã, ana bemakis ã hãtxa ã hatu yunuamaki.

Hanua hanu hatuki dasikatsi hatũ bushka anu ã hãtxa mistukĩ hatũ huĩti bena watã ã hãtxa ã hatuki kenea keska washanaii’ ”,

iwanã, ana ha hãtxakiri yuikĩ:

¹⁷ “Hatũ txakabu hatu buashũtã

ã ana haska hatukiri xinãma ikũkaĩshanaii”,

Yavẽ Deusũ ea waxinaki, aka Jeremiasĩ nĩkatã nuku keneshuniki.

¹⁸Ma nukũ txakabu pewatã nuku buashunikẽ ana tsuã hatũ txakabu buanũ ishũ yuinaka ana tesẽshũ hau ana hamẽ yuinaka kuayamakubainũbũwẽ.

Deus yubakaniki haki dasi kakatsi txitũtimakiaki, na hãtxarã

¹⁹Ë betsabu inũ ã puibuũ, haskawẽ taea Jesus Cristo nuku mawashũkĩ hawẽ himi habawaniwẽ taearã, natiã hawa dateama Deusbe hãtxanũ ika hawẽ dĩtu meribi anu hikiai keskatã nũ haki ma kematirubuki.

²⁰Ha meribi dĩtu anu hanu besti wai hawenabu Deusbe hãtxashunika besti hikibiakubaĩmisbũ eskatiã Jesusũ ha tariwẽ bepunibu keska nuku bepẽshũkinã, hawẽ yurawẽ mawakĩ ha meribi dĩtu bepunibu bepeã keska waniki, hawẽ taea ha bai bena txibãkĩ hawẽ kai nũ Deusbe hãtxakubaĩshanũbũ nuku ashũkinã. ²¹Natianã, nukũ Deusbe nuku

hãtxashunika kayabi Deus bebũ ma niaki. ²²Haskawẽ taea nukuri Deusbe hãtxanũ ika nukũ xinã txakabũ nuku mekemis ana mekemama ũpashwẽ txuki keskatã nukũ huĩti shũpĩtã txanima kayabi ikũ kayabi wai Deusbe hãtxakubainãkãwẽ. ²³Habias mestẽwãtã xinã betsa betsapa wai txĩtuãma haska nũ ikũwãkĩ yuiiai besti manakakubainãkãwẽ. Txanima Deus yubakanishũ nuku ashũshanikiki, kaneamarã. ²⁴Ha inũ, nũ habũ ikũwaĩburã, merabenaĩ abunamei pepai duanamekubainãkãwẽ. ²⁵Ha inũ, Deusũ hãtxa tapĩ itxai heneyamakubainãkãwẽ, haskai betsabu babui txĩtũkanikikirã. Haskama betsabube merabenãkatsis ikĩ hatu uĩmakĩ hamakiri xinãbiabainaibũ hatu beya wakĩ xinã txãkãwãkĩ hatu benimawakubaĩkãwẽ. Hatu haska wakĩ ma Jesus ana hua kemai uĩkatsirã, xinã txãkãhairai hatube itxai heneyamakubaĩkãwẽ.

²⁶Ma Jesus Cristokiri unãti wakĩ txanima tapĩbiatã haratubũra hawa xinã betsa maewama ana nukũmebi txakabu mei atimapai huĩti kuxikĩ nũ akaiburã, ana hawa betsawẽ Deus daewati nũ hayamahairakiaki. ²⁷Txitũtã nũ hawẽ hiwei kairã, Deus hatuki sinatakĩ hatu kupitxakayamakĩ txi merã hatu menukĩ keyushanai besti manakanikiki. Uĩrakãwẽ, mesekirã. ²⁸Nukũ shenipabũ Deusũ Moisés yusã hãtxa nĩkama txakabuwaibu dabe kasmai dabe inũ besti habias hakiri yui kaneabumakẽ hatu unãti watã hawa hatuwẽ nuiama kupikĩ tenãpaunibukiaki. Natiã ha yununi mese hayayuaki. ²⁹Matubunã, xinãkãwẽ. Tsuabũ meshanimẽkaĩ, ha hawa hatuwẽ nuiama Deusũ hatu kupitxakayamashanairã. Jesus Cristõ himiwẽ hawẽ hatu yubani Deusũ Yushĩnĩ hawẽ taeshũ hatu abubia tsuabũra Deusũ bakeki hameĩ haki kashekĩ hawẽ himi hatu habashũbiani danãkĩ itxakanikiki, hawẽ taea habũ ikũwaĩbu pepati wabianikenã. ³⁰Hanushũ Deusũ hawẽ hãtxa yunui hamebi yubakai hãtxai: “Tsuãra matu txakabuwaya meyamashãkãwẽ. Emebi Ê Hiwemistũ ha txakabuwaibu eã ã hatu kupishanaii”, iniki. Ana betsa txani: “Yavẽ Deusũ hawenabu unãti watã hatu manakushanikiki”, arianiki. ³¹Txanima hawara tibi txakabui ikaiburã, mese beshmaski. Hamẽ Deus Hiweatũ hatu kupiai tibi ishanairã, mese mepakekubaĩshãkanikiki, hau haki besti datekubainũbũwẽ.

³²Hanu mã Jesus ikũwãkĩ taewaitiã mã ini xinãkãwẽ. Habũ ikũwãkatsi ikabumã matu bika tenemabiabu mestõtã mã binukubaĩyamaki.

³³Hanushũ hatiri matubi itxakĩ mirimabũ uĩaĩbũ bika betsa betsapawẽ matu memaibũ hanua betsabu ha nuitapaibube hatuki dasishũ hẽ iyamai dateama mã hatu merabewakubainibuki. ³⁴Jesusunabu betsabu hatuki sinatakĩ bitxiti hiwe merã hatu bitxiabu nuitapaibuki mã batãtanaya matũ mabu inũ matũ hiwe matu biãbũ hawa yuiama benimakĩ matũ hamapai hatu heneshũkĩ Deus kẽwãkĩ hawẽ mae pepa nai anu hawa txapuisma hanu hiwei ikibi iki mã kashanai haska mã xinãkubaĩyamaki. ³⁵Haskawẽ taeshũ mã ikũwaĩnã, benuyamakãwẽ, mã ma haki txiti

ika bika tenemiswẽ taeshũ matu itxapa manakushanikiki. ³⁶Hamẽ matu akabumaki, bika tenemakinã. Haska Deus yubakani haska xinã keskawẽ matu akaiburã, dateama binui hawẽ mestẽkubaikãwẽ. Mã haska tenekubaĩmisbuwẽ taeshũ haska Deus yubakaniwẽ matu manakua txanima mã uĩshanaii. ³⁷Deusũ hawẽ hãtxa yuishunika hãtxa wa hatu keneshũkĩ:

“Ë haskakiri yubakairã,
hawa manakubiranama hawaira iki hushanikiki.

³⁸ Tsuabura pepabunã,
haska ã yubakai xinãkĩ ikũwaĩ hawẽ hiweshãkanikiki.
Hamẽ tsuabũra ha ã yubakai ikũwãkĩ
mestẽwãkatsi ikama txĩtuaĩburã,
ã ana habuwẽ benimama ishanaii”,

aka nĩkashũ nuku keneshuniki. ³⁹Haskakẽ betsabũ Jesus txibaĩ txĩtuaĩbu habu Deusũ kupiaya ea inũ mã ebetã Jesus ikũwaĩ txĩtuaĩma nũ txibãkubaĩmisburã, hawẽ pashai Deusbe nũ hiwekũkaĩshanaii.

**Haskakĩ hatũ shenipabu itxapabũ Deusũ hãtxa
ikũwãpaunibukiaki, na hãtxarã**

11 ¹Deusũ yubakati hãtxa txanima ikũwãkĩ hawa uĩriamabia hamapai tibi pepawẽ Deusũ nuku duawashanai hayakatsi hawa xinã betsa wama mestẽ besti watã nũ manakahairakubaĩtirubuki. ²Nukũ shenipabu itxapabũ Deusũ yubakati hãtxa haya ha ikũwãkubainaibuwẽ taeshũ Deusũ hatũ xinã unãtã hatukiri pe xinã benimakũkainikiaki.

³Hamẽ hawara nũ uiaĩ inũ nũ uĩtiruma dasibi mai inũ nai anu damiwakinã, hawẽ hãtxa kuxipawẽ besti Deusũ damiwanirã, ikũwãkĩ nũ unãkubainaii.

⁴Ha inũ, Adãonẽ huni bake dabe Deusũ yunuxina hawẽ hãtxa Abelĩ ikũwãkĩ txibãkĩ hawẽ Deus kẽwãti txashuwã teseshũ kuakĩ keyushũbiaya hawẽ betsa Caimnẽ Deusũ yunua hãtxa txibãma hawẽ bai anua yunu besti kuashũkĩ Deus kẽwãpaiabiaya Abelĩ kẽwãti besti Deusũ abukĩ hawẽ hãtxa ikũwaĩ unai: “Huni pepaki”, anikiaki. Ha inũ, Abel mawabianikẽ haska ikũwãkĩ tates taewatã henebaini habiawẽri nũ ikũwãkubaĩshanũ Deusũ hãtxa Abelkiri kenenibu uĩkĩ nũ unãriakubaĩmiski.

⁵Ha inũ, Enoque huni pepatũ Deusũ hãtxa ikũwãkĩ txibãkĩ heneama Deusbe haibunamekĩ Deus benimawakubainaya hawenabu uĩmamabaĩkĩ hau mawayamanũ Enoque Deusũ nai anu aininikiaki. Haska kenenibu nũ uĩmiski. ⁶Ha inũ, tsuabũra Deusũ hãtxa ikũwãbumarã, haskatã Deus benimawatirubumaki. Hafia tsuabũra Deus hiwea haya inũ hatũ hatu manakushanai benakĩ hau ikũ besti wakubainũbũwẽ.

⁷Ha inũ, nukũ shenipabu Noẽ Deus ikũwãyã Deusũ bebũkiri haska washanai iriama uĩyamabia huni pepakĩ Deusũ yunuti txibãkĩ hawẽ

hawenabu pashawakatsi nunuti ewapa wanikiaki. Haska Deus ikūwaĩwē taeshū Deusū mekekī hawē pewē manakukī pashawanikiaki. Habias hātxa ikūwākī txibaĩwē pashakī yurabu mai hirabi anuabu Noē hatu kupinikiaki.

⁸Ha inū, Abraõonē Deus ikūwākī txibākubainaiwē taea Deus habe haria yubakakatsi ikī Deusū kena hawa hē iyamama ikūwaĩwē taea hawē mae henei tashnikaini hani kai unāmabia ha mai pakea betsa anu Deusū ināshanai anu kanikiaki. ⁹Deusū haska yubaimawē taea hawē xinānē besti ikūwaĩ ha mai pakea anu txipu ibuwanūbariai ha xinaĩ nawa betsa keska hiweyunikiaki. Haska hiweirā, tari pūtebaũki hiwe watā hiweakeakeniki. Habiaskariai hawē bake Isaque inū hawē baba Jacó ha Deusū hatu yubani ibuwashanū ika hiweriakubainibukiaki. ¹⁰Deusū hawē dami hawa kaneismatū ma hatu mestēwāshuni anu hari hatu hiwemashanai maewā Abraõonē xinaĩ na mai anushū dukū mana taewanikiaki.

¹¹Ha inū, Abraõonē aĩ kayabi Sara ma yushabuhairakī bake bitirumabiakē Abraõonē ikūwā besti ha dikabi ma ika kai mestebuhairabia Deusū merabewa bake wanikiaki, Deus habe yubakaima parāma ha meneshūshanai ikūwākubaiyamawē taeshunā. ¹²Tsuā haska watirumai Abraõo anibuhairabiatū bake waima hanua hawē bababu mirimahaira bixiti inū iā kesha anu maxiti tsuā hati tanatiruma keska pahairanibukiaki.

¹³Hamē ha yurabu haska Deusū hatu yubani hari hiweriamabia ikūwā besti mawanibukiaki. Hakia Deusū yubani bebūkirihairashū ikūwākī besti xinaĩ punu nukama manakakī habū ibubis xinaĩ: “Na nawā mai anu baii niyua keskakī Deusū mae pepa nai anua nū hari kashanai anu nū manakakubainaii”, ikubainibukiaki. ¹⁴Habū haska yuibiakī hatū mae kayabi betxiriama shabakabi nīkakī unābiai haskara dabanē ha mae manaka bestikubaĩkanikiki. ¹⁵Haska hatū mae anua benibu pe dabanē xinaĩ ana hawēri txītūkeanibukiaki. ¹⁶Haskama ha mae pepahaira hawērua nū haska uĩriama txakabuma nai anu Deusū hatu yubayama xinaĩ habianus hiweyunibukiaki. Haskakē habu katuni Deusū ma hatū maewā pewashuniwē taea Deus hatuki dakeama hatu xinaĩ: “Ē hatū merabenā Yushīki”, imiski.

¹⁷⁻¹⁸Ha inū, Abraõonē Deus ikūwāniwē taeshū Deusū hawē bake Isaquekiri yubakī yuikī: “Isaquewē mī bababu itxapa mia washūshanikiki”, abianishū hanushū haska ikū ea txibaĩmēkaĩ? ishū unāti wa hawē bake Isaque Abraõonē Deus inākī kua keyushunū, iwanā, hawa yaxui hawē nuiama hawē bake bestitxai iyui kanikiaki. ¹⁹Haska Deusū ashua uĩkī hawē kuxipakiri Abraõonē tapīniki, Deusū mawabu bestēwātirukiri tapīkinā. Haskawē taeshū hawē bake inākī Deus tenāshūbiai kashū ana hawēri hawē bake hiwea txītūwābirākī hawa

wama ishu keska iwenikiaki. Haska wakĩ Deusũ kuxipa hawẽ xinãmati shabakabi hatu unãmaniki.

²⁰Ha inũ, Deusũ hawenabu duawashanai Isaquẽ ikũwãkĩ hawẽ bake Jacó inũ Esaú hãtxa pewẽ Deus hatu yukashunikiaki.

²¹Ha inũ, Jacó Deus ikũwaĩ ma mawa kemashũ hawẽ mestẽti tsumatã Deus kẽwãkĩ hawẽ baba Josẽ huni bake dabe hãtxa pepawẽ hatu duawakĩ yukashũrianikiaki.

²²Ha inũ, Deusũ Israelbu Egito anua hatu tashnimabainũbariai Josẽ ikũwaĩ mawakĩ hawenabu hatu yuikĩ: “Nenua kaĩbaĩkinã, mai pakea pepa Deusũ matu ibu wamashanai anu ẽ shau ẽ bababũ hau ea bunũbarinũbũwẽ”, akĩ hatu yununikiaki.

²³Ha inũ, Israelbu pahairaiuwẽ taea Egitonawa shanẽ ibu hatuwẽ datekĩ hatũ huni bakebu kaĩai hau tenãkubainũbũ ishũ hatu yunubiaimakẽ hawa dateama Moisés ibubũ Deus ikũwãkĩ hatũ bake hawẽruahaira kaĩaiwẽ nuikĩ ushe dabe inũ besti huneyunibukiaki.

²⁴Ha inũ, Egitonawa shanẽ ibu Faraónẽ aĩbu bakẽ Moisés hene anu nunua neshetã ma yumewaimawẽ taea huni ewa Moisés hawẽ bake hatu wamakĩ hatu kenamakatsi ikama Deus ikũwaiwẽ taea ²⁵Moisés katukinã, Egitonawabũ beya hatubetã mei benimai hatube txakabui hiwekatsi ikama haska hawenabũ bika teneaubube merabewai hatube nuitapakatsi haska xinãkĩ katunikiaki. ²⁶Hanushũ Deus ikũwãkĩ hawara Deus yubakani manakĩ Egitonawabũ mabu pepa betsa betsapa Moisés inaĩbuwẽ taea Messias Cristo ha kẽwãma shanẽ ibu wabu hawẽ kêtiru unãbiai shanẽ ibũ hiwe anua kaĩkaini Deus kẽwai hatũ merabenã Messias Cristo hawenabubetã manakai bika tenei yumãbiai manakuti pepa Deus anua hawa benuama inãshanai Moisés haska katunikiaki.

²⁷Haskakẽ Egitonawabu shanẽ ibu haki sinatabiaya hawa haki dateama Egito mai pakea anua kaĩkainima Deus uĩtirumabia ikũhairawakĩ xinã betsa wama ikũkainikiaki. ²⁸Ha inũ, Deusũ yunua nĩkatã ikũwãkĩ Moisés hawenabu Páscoa besi hatu tates taewamakĩ misi shashama inũ txashuwã bake nami shui hatu pimakĩ txashuwã himi hiwe tibi hanu hikiti shui sheshekaiã hatu kepushmakĩ keyukẽ Deusũ nai tsuma debuwanikatũ Egitonawã huni bake iuwabu dasibi hatu debuwabiakĩ Israelbu hawa meama dũkebainikiaki.

²⁹Ha inũ, Israelbu Egito anua pashai bui Iãnẽwã Taxipa namakis pashkatã Deusũ hatu bai wakĩ metu washuna Deusũ meketi kuxipa ikũwaĩ Israelbu pukei keyuabũ hakia Egitonawabu habias baiwẽ hatu txibãbaini pukeriai hasai keyunibukiaki.

³⁰Haska inũ, Israelbũ Deusũ yunua nĩkatã katã katãkĩ shaba metutitiã hatu dũkebaunaibũ Jericó mae mixki ewapabuwẽ kenebaunibu di iki keyuaya Deus ikũwãkĩ Israelbũ hatu detekĩ maemakĩ yamawanikiaki. ³¹Ha inũ, habianuari Raabe aĩbu hininipabia Deuski mesekĩ Israeli baba dabe

unätinaĩ buabu hatu itã merabewaxinawẽ taeshũ txakabukubaĩmisbu Jericó anu habe hiweabu hatu yamawakĩ Israelbũ Raabe tenãma inibukiaki.

³²Matũ shenipabũ Deus ikũwãkĩ Gideão inũ, Baraque inũ, Sansão inũ, Jefté inũ, Davi inũ, Samuel inũ, Deusũ hãtxa yuishunika betsa betsapabũ haska wakubainibu ana ẽ matu yuikatsi ibiakĩ haska washũ ẽ matu yui keyutirumaki. ³³Betsabũ Deus ikũwãkĩ shanẽ ibu betsabũ mae mebinibukiaki. Betsabũ Deus ikũwãkĩ hatũ mae anu shanẽ ibukĩ hatu pe hiwemakubainibukiaki. Betsabũ Deusũ yubaka hãtxa ikũwãkĩ Deusũ kuxipa bitã hatuna wakubainibukiaki. Betsabu inu pubẽbu anu yunukĩ hatu bitxiabu Deus ikũwaĩwẽ taeshũ hawẽ kuxipawẽ Deusũ hatu nemashuna habu piama inikiaki. ³⁴Betsabu itxakawakĩ tenãnũ, iwanã, txi merã hatu putabu Deus ikũwãkĩ hawẽ kuxipawẽ txi nematã hawa menuama kaĩnibukiaki. Betsabu nupe hawẽ detenameti bestiwẽ hatu detepanãbũ Deus ikũwaĩbuwẽ taea pashanibukiaki. Haskakẽ huĩti babubũ ikũhairawakĩ taewaibu Deusũ hatu kuxipa wakubainaya nawabũ Deusũ enabuki sinataibu detekatsis ikaibu maemakĩ hatu pashamanibukiaki. ³⁵Ha inũ, betsarã, aĩbu betsabũ hatũ bakebu mawa manukĩ Deus ikũhairawaibu Deusũ hatu bestẽwãshunikiaki.

Hamẽ huni betsabũ Deusũ hãtxa txibãkubainaibuwẽ taeshũ hatuki sinatakĩ hatu itxakawakĩ haska habũ abuai keska bima pashama hakia mawa ana bestëtã hiwea pepa bishanai xinaĩ mawakubainibukiaki.

³⁶Ha inũ, betsabũ Deusũ hãtxa ikũwãmisbu nuitapawakĩ hatu kashewakĩ betsabũ kuxa kuxa akĩ betsabũ mane dispiwẽ neshatã hatu bitximapaunibukiaki. ³⁷Ha inũ, betsarã, Deus ikũwaĩwẽ taeshũ betsabũ mäkãwẽ hatu tsaka tsaka akĩ hatu tenãpakeaibũ betsabũ hawẽ hi nisatiwẽ hatu meshtekĩ nisanibukiaki. Deus hatu danãmakatsi ikĩ hamapai xarabu bika hatu tenemakĩ hatũ nupe txaipawẽ betsabũ hatu detekĩ tenaĩbũ betsabũ itxakawakĩ hatu nuitapawabu pashai hamakiri kakĩ txashuwã bitxi tari besti sawea yumãhairakubainibukiaki, ³⁸habu haskanu hiwetirubumabia mae txakabu hanu tsua hiwetirubumanu buni yuinaka keskai mati tenãmã tãpe anu hiwekubaunirã. Haskai yumãkubainaibũ habũ hatu itxakawaibu hatu binuhairabiakẽ hunibu txakabũ hawa hatu kẽwãma hatu danã bestikubainibukiaki.

³⁹Haskabia habũ Deusũ yubani xinãkĩ ikũwaĩbuwẽ taeshũ hawẽ yubaka hatu uĩmariamabia Deus hatuki petxiama hatu unãti watã hatuwẽ benimakũkainikiaki. ⁴⁰Deusũ hatu haska wakinã, haska yubakani habu bebũshũ besti akatsi ikama nukubukiriri xinãkĩ hanus nuku shuku watã haska yubakani pehaira nuku inãkatsi nuku hatube itxawashanikiki, hiwekuĩa anu nuku hatube hiwemakinã.

Hawẽ bake ikũwaĩbu Deusũ hatu pewamiskiaki, na hãtxarã

12 ¹Haskakẽ nukunabũ habu dukütũ Deusũ yubaka hãtxa ikũwãkĩ bika betsa betsapa hatu tenemakĩ memabu habuã

hatū xinā nuku uĩmakubainishū natiā nuku uĩkanikiki. Xinanākāwē. Nuku hatū itimaska wai inū hamapai txakabu tibitū nuku beshetiru henetā beamabaĩkĩ hawara pepa Deusū nuku yubamis ha xinaĩ kuxipai dayashūkĩ heneyamakubainākāwē. ²Cristo nuku ishuni hakiri dukū unākĩ xinākubainākāwē. Habū nū ikūwaĩbu nū haki txiti ikabu hatunā ma nuku pewashūkubainikiki. Haskawē taea Jesus cruzkia nuitapairā, ha itxakawakĩ nuitapawaibu hawē dake xināma nuku mawashuniki. Haskairā, nuitapawabiabu mawakĩ binutā benima paepayabi hawē Epā shanē ibu tsauti yusiuri habe shanē ibui tsaushanai unaĩ iniki.

³Ha inū, yurabu hatu merabewakĩ hatu uĩmabia habū ikūwākatsi ikama huni txakabubū Jesus itxakawabu yumābiakĩ hawē Epā yunuti hātxa Jesusū heneama ini haska keska xinākubaĩkāwē, Jesus ikūwaĩ punu nukai Deusū baiwē kabiai mā beshtekeyamakubaĩshanūbunā. ⁴Ha inū, txakabu tibi binui mā bika tenekubainai Jesus nuku ishuni keskai tsua mā mawariamaki. ⁵⁻⁶Ha inū, nū hawē bakebu Deusū nuku yusĩni mā hakimaii. Matū shenipabu shanē ibu unānepa Salomāonē eska hawē bakebu yuikĩ:

“Ē bakebuū, haska Deus matuwē nuikĩ
matu pewamis matu yuinū nĩkakāwē.
Deusū tsuabura abukĩ
hawara bika tenemakĩ hatu kupimiski.
Ha inū, tsuabura Deusū hawenabu wakĩ
hatū txakabu hatu unāmamiski,
nū ana ayamashanūbunā.
Haskawē taeshū hawara bikawē Deusū matu unāmai
danāyamakāwē.
Ha dikabi, matu kūyā akaya
punu nukariayamakāwē”

hatu haska wapauni na hātxa hakimayamakāwē, Deusū habias matu ana yuiiai keska xinākinā. ⁷⁻⁸Ha inū, huni dasibibū hatū bakebu abukĩ yusĩkĩ hatu pewamishwē taeshū: “Ē bakebu pewanū”, iwanā, hawara bika Deusū matu tenemakĩ matu pewaikiki, matu besti pewamarā, haka ikūwaĩbu betsa betsapa habiaskasri hatu wakinā. Hamē bika tenemakĩ Deusū matu pewama mā hawē bakema keska itiruki, bake ibuuma keskairā. ⁹Ha inū, nū huni ewariama nukū ibubū nuku yusĩkĩ nemahairakĩ nuku tapĩmakubainibuki. Hatū yusĩa bikabiakē tapĩkĩ nū hatu abukubainibuki. Haka haska nū wani binukĩ nukū Epa Deus nai anua abukĩ natiā hawē hātxa nĩkakubaini nū habe hiweshanai, hawa txakabuwē nuku kupiamarā. ¹⁰Na mai anu nuku hiwemakĩ yumewakĩ nukū ibubū yusĩkĩ bika tenemakĩ nuku beshmas pewayunibuki. Haka nū Deusunabu meribi wakĩ nuku pewakĩ bika tenemakĩ Deusū xināmis keska txanima nukūri nū xinākubainūbū Deusū nuku pewakubaĩmiski, nuku ha keskari wanū

ikarã. ¹¹Ha inũ, txanima Deusũ pewakĩ nuku kupia shuama mebiatã txipu hakimatã hanushũ hawẽ yusĩa pepa tapĩkĩ hawẽ hiwea unãnuma pe hiwekũkainai unãtirubuki.

¹²Deusũ pewati yusĩa bikabiakẽ ana mesteĩ kuxipakĩ ana Deus kẽwaĩ matũ mekẽ mexatã dãti ishũ kẽwãkĩ heneyamakubaĩkãwẽ. ¹³Ha inũ, Jesus ikũwaĩ hawawẽra bika teneaibu punu nukai hau txitũyamanũbũ haska Deusũ abuai yusĩkĩ bai kayabikiri hatu pe unãmakubaĩkãwẽ.

Deusũ hãtxa danaĩnã, mesehairakiaki, na hãtxarã

¹⁴Ha inũ, tsuabura dasibibube mã unãnuma hiwekatsis ikairã, nuikipakĩ dasibi nukũ Shanẽ Ibũ yusĩa txibaĩ pepa besti hiwekubaĩkãwẽ. Hamẽ mã pepai hiweismarã, haskatã nukũ Shanẽ Ibuki dasitã mã hiwetirubumaki. ¹⁵Tsuabura Deusũ inãkuĩ pepa danãma hau hayai keyunũbũwẽ. Hamẽ haskama tsuara mã huĩti sinayarã, sika tatxa paepa keskatũ hatu daũkĩ akawakĩ yurabu mã hatu danãmatiruki. Uĩrakubaĩkãwẽ. ¹⁶Matunã, tsuara txutawẽ kemukĩ Deusũ hawẽ pepa ma matuki tanabiani kaneyamakãwẽ. Haskakĩ Esaũ Deuskiri xinãma piti bestiwe kemukĩ xinãkĩ hawẽ betsa mashkubiakẽ hawẽ piti pinũ, iwanã, haska iuwatũ pepa bimis inãniki, hawena benukinã. ¹⁷Hamẽ Esaũ txipu hawẽ epa yuikĩ: “Mĩ bake iuwa besti earã, hau Deusũ ea duawashanũ Deus ea yukashũriawe”, atuxia hakia hawẽ bake mashku Jacõ hawẽ epa Isaque parã dama Deus yukashũkĩ menetã hawẽ epã haska washũ Esaũ ana hawawẽ pewatima nemabia kashahairakĩ Esaũ ana yukabia hawẽ epã hawẽ yuba haska washũ ana maewashũtima inikiaki, haska matubũ mã unaĩnã. Mã txipu haskariatirubuki. Uĩrakubaĩkãwẽ.

¹⁸Nukunabu Israelbu txaimashũ uĩnibu keska ma haskamaki. Hatukiri ana matu yuinũ nĩkakãwẽ. Habunã, mati ketia here hi ikai tsuã metiruma iniki. Ha inũ, mexu merã inũ niwe kuxipa shũku ikai anu mapunibu keska mã haska keskamariki. ¹⁹Ha inũ, trombeta txã ikai nĩkama hawa Deusũ hui kaĩyaĩ nĩkamari inibuki. Hamẽ habuã ha hui tashniai nĩkakĩ hau ana hãtxayamanũ nemakĩ ea anibuki. ²⁰Haska Deusũ shabakabi hatu yuia hawenabu Moisés nemakĩ: “Tsuara hawẽ mati anu paikẽ hau mawanũ mãkãwẽ tsaka tsaka akasmakĩ txatxitiwẽ pupe akĩ hatu debuwakãwẽ, inabu inũ yuraburã”, akĩ hatu yuia nĩkai haska tenetirubuma inikiaki, ha yunuti mesewẽ taearã. ²¹Deusũ hawẽ kuxipa tashnima mesehaira uĩaĩbũ habiaskariai Moisés hatu yuikĩ: “Eari datei ẽ saki saki ikai”, inikiaki.

²²Maturã, nukũ shenipabu na mai anua Deuski nukua datenibu keskama txanima kayabi Mati Sĩa inũ Deus hiweatũ maewã Jerusalém pepa txasha txasha ikai nai anu hanu hawẽ nai tsumabu hanu haki dasia tsuã hati tanatiruma habũ Deus kẽwaĩbu haskabu anu mã ma ikũwaĩ haki kemaki. ²³Habu dukũtũ Deus ikũwaĩ hawẽ bake ikubainibu ma hatũ

kena nai anu hatu keneshũ netãni ha yurabu Deus hiweshuni pemisbu hatũ yushĩ Deus dasibi pewanikatũ ma hatu hawa txakabuma wayama Deus dapi ma haki kemani mapuabu nũ xinaiĩ. ²⁴Ha dikabi Jesusũ hawẽ yuba bena nuku washũkinã, mawai hawẽ himi habakĩ Abeli himi binuniki, hawẽ taeshũ Deusũ nukũ txakabu nuku buashũti wakinã. Hamẽ Abeli himirã, hawẽ taea Deus sinatai hawẽ yupukunaniki, tsuã txakabu buatimarã.

²⁵Ha inũ, Mati Sinai anushũ Deusũ hawẽ yunua hatu yuibia nĩkama hawẽ kupiti pashama inibuki. Ikis nai anushũ Deusũ hawẽ bakebetã nuku yusiãĩ haskanibu keskakĩ nũ nĩkama nukuri nũ haskatã pashatirubumawẽ taeshũ hawara Deusũ nuku unãmai haki petxita danãma uĩrakubainãkãwẽ. ²⁶Ha inũ, hatu yusiãitiã hawẽ huiwẽ Deus hiwemistũ mai patxa sakumatã txipu ana hatu yubakĩ: “Ana bestiwakĩ mai inũ hawara nai anua dasibi ẽ ana patxa sakumashanaii, mai bestimarã”, hatu waimakẽ nuku keneshunibuki. ²⁷Hakiri yuikĩ: “Ana bestiwakĩ ẽ ashanaii”, inirã, ha mai damiwani anua hamapai tibi maewakeaketã hanushũ hawara Deusũ abuai maewama hau betsama ipakeshanũbũ dasibi damiwani Deusũ ana patxa sakumaya hawara Deusũ mekekatsi ikama hamebi yamai keyushanairã, nũ tapitirubuki. ²⁸Hanu Deus shanẽ ibui hiwemis hawẽ shanẽ nuku hanu hiwemashanairã, hawa maeama ishanikiki. Haskakẽ Deus pehaira wakĩ kẽwãkĩ xinã txãkãwãkĩ haki mesekĩ hawara haska abuai keska benimawakĩ ashũkubainãkãwẽ. ²⁹Nukũ Deus kuxiparã, txi keskaki, dasibi yamawakĩ keyutirurã.

Haskakĩ nũ Deus xinã txãkãwãtirukiaki, na hãtxarã

13 ¹Ma hawẽ henea yusiã kene ẽ matu bumai uĩkãwẽ. Jesus matubetã ikũwaĩbube nui heneama hatube abunamei duanamepakekubaĩkãwẽ. ²Haska besti xinãkĩ hamapai pepa hakimama matuki bai beaibu itã hatu duawakĩ pimakubaĩshãkãwẽ. Habiaskari wakĩ ikũwaĩbu betsabũ Deusũ nai tsumabu hawa unãma hatu pimakĩ ushãpaunibukiaki.

³Ha inũ, Jesus ikũwaĩbuwẽ taeshũ bitxiti hiwe anu hatu bitxiabu hatuwẽ petxiama hatuwẽ nuikĩ matu habe bitxiabu keska xinãkĩ hatu merabewakubaĩshãkãwẽ, haskai nuitapaibu unãkinã. Ha inũ, hatu itxakawaibuwẽ nuikĩ hatu merabewakãwẽ, habiaskari matu waibu mã metiru xinãkinã.

⁴Ha inũ, txutanamebaũmisbu inũ beneyabia inũ aiyãbia txakabui kemumisbu Deusũ hatu unãti watã kupiakeakeshanaiwẽ taea tsuãra ikũwaĩ aiyãtã betsawẽ ana kemuama ha besti uĩ haska mã abunamerabei mekei habe hiwekubaĩkãwẽ. Beneyatãri betsawẽ ana kemuamari ha besti uĩ haska mã abunamerabei mekei habe hiweriakubaĩkãwẽ.

⁵Haska inũ, hawẽ mabu itxa wanũ ika peiwẽ kemuama hawara besti mã hayawẽ benimakubaĩkãwẽ, Deusũ nuku yubakĩ: “Ë matu putama inũ ã matu henetaskama ishanaii”, iniwẽ taearã. ⁶Haskakẽ ma nuku yubani haska haki txiti itã hawa dateama yuikĩ:

“Yavé Deusũ ea merabewamiswẽ taea
hamapai tibiwẽ tsuabũra txakabuwanũ ishũ
ea amanũ ikaibu

‘Ë Shanẽ Ibũ ea merabewaya ã dateamaki’ ”,
ikĩ hatu yuikubaĩtiki, dateamarã.

⁷Haska inũ, Deusũ hãtxa Cristokiri habũ matu yusĩki matu pe mekekubaĩki matu xinã betsa wamanibuki. Haskawẽ taeshũ habũ Deus ikũwãki txibãkubainibu haska hatũ hiwea pepa akĩ henebainibu xinãki matũri ikũwãriai habiaskariai hiweriakubaĩkãwẽ.

⁸Ha inũ, Jesus Cristorã, hawa maei betsaisma habiaskaski, uatiã inũ, natiã ikai inũ, ipakeshanairã. ⁹Haskakẽ yusĩa betsa betsapa benawakĩ matu yusĩaĩbu hatu hawa nĩkayamakubaĩshãkãwẽ. Hamẽ nũ Deus xinãkubainaibu nukuwẽ nuikĩ merabewakĩ nuku kuxipa wamiski. Hakia habu parananãki betsa kaya hatũ beya pitikiri matu yusĩki bikawaĩbu hatu nĩkayamakãwẽ, piti beya betsakiri txibãki matũ huĩti tsuã ana kuxipa watirumakirã.

¹⁰Ha inũ, nukũ txakabu buanũ ika Jesus ma nuku mawashuni nukubu nũ hayabiakẽ tsuabũra judeubũ shenipabũ beya henekatsi ikama yuinaka menukĩ hatũ txakabu buanũ ikaiburã, hamẽ akanikiki. Nukũ merabenãtũ kuxipa hayatirubumariki. ¹¹Ha inũ, Deus daewakĩ nukunabũ txakabu hau Deusũ buatã ana xinãyamanũ Deusbe nukunabu hãtxashunika shanẽ ibu binuatũ yuinaka tesëshũ hatũ himi meribihaira dũtu anu bukẽ hanua hawẽ nami mae pekatxushũ hawẽ yura kuakĩ keyumisbuki. ¹²Habiaskari wakĩ hawẽ himiwẽ hawenabũ txakabu Deus buamashũki nuku meribi pepawanũ ika mae pekatxu anuari Jesus nuku tenãshunaburi nuku mawashuniki. ¹³Haskakẽ Jesus anibu keska wakĩ nukuri nuitapa wakĩ dakewaibu ha bai Jesusũ nuku tatesshũbaini txibãki judeubũ beya ana xinãma nuitapabiai dakeama ikubainãkãwẽ. ¹⁴Haska inũ, na mai anu nũ hiweyuarã, mae putatimai has ibua hawẽ nui nũ hanus ipatirubumaki. Hakia Deusũ maewã pepa ha yubani tashnimashanai haskawẽ nũ hiweshanai xinã bestiki nũ manakayuiai. ¹⁵Haskakẽ Jesus Cristo nuku mawashuni xinãki heneama nukũ huiwẽ Deus kẽwãkubainãkãwẽ. Haska wakĩ nũ Deus benimawatiruki, yuinaka kuapaunibu keska wakinã. ¹⁶Ha inũ, Deus xinã txãkãwanũ, iwanã, ana matũ hamapaiwẽ nuiama pepakĩ ikũwãĩ betsabuwẽ nuikĩ hatu merabewai hawara mã haya itxapa kasmai eskarabes pashkashũ yauxiama hatu inãki heneyamakubaĩkãwẽ, haska wakĩ Deus xinã txãkãwãkinã. ¹⁷Ha inũ, matu yusĩki mekekubainaibu hatũ yusĩa nĩkatã hatuki txiti ikĩ txibãkubaĩkãwẽ. Haska matu putama

hawa huĩrukuãma mekekubaĩmisbu habiaskari Deusũ unãkĩ hatu manakumiski. Ha inũ, hatũ daya itimaska wama nĩkahairakĩ mã hatu benimawakubaĩtirubuki. Hafia nĩkama mã hatu itimaska wakĩ mã hawa tapĩkĩ pewai kaĩtirubumaki.

¹⁸Ha inũ, Jesusũ hãtxa yusĩkĩ nũ pe txibãmis unãkĩ dasibi pe hiwekĩ nũ hatu pe uĩmakubainũbũ Deus dayuikĩ nukukiri ea ashũkubaĩkãwẽ.

¹⁹Ha inũ, matu anu ẽ ana txĩtũkatsis ikaiwẽ taeshũ menã Deus ea yukashũrikãwẽ, matu anu ẽ hawaira kashanunã.

Deusũ hau hatu duawakubainũ yununikiaki, na hãtxarã

²⁰Nukũ Shanẽ Ibu Jesusũ himiwẽ Deusũ yuba bena ikibi ika ma pewani hawẽ bake txashuwã mekenika pepa keska nukũ mekenã bestẽwanitũ unãnuma hawẽ kuxipawẽ nuku hiwemakubaĩkatsis ikikiki. ²¹Deusũ haskakiri matu xinaĩ yubakani hatũ hau matu dasibi pewakubainũwẽ. Habiaskari wakĩ haska abuai keska wakĩ hau nuku amariakubainũwẽ, Jesus Cristowẽ taeshunã. Haskakẽ nukũ merabenã Cristo kẽhairawakubainãkãwẽ. Haskakirã.

²²Ë betsabu inũ ẽ puibuũ, ẽ kene txaipamawẽ ẽ matu merabewakĩ benimawakatsis ikai hawa eki sinatama xinã pewatã uĩrakubaĩkãwẽ. ²³Ha inũ, nukũ betsa Timóteo bitxiti hiwe anua ma tashnimaxinabu ẽ matu unãmaii. Hawairakirã eki nukuaya habe kashũ ẽ matu betximai kashanaii.

²⁴Ha inũ, matu yusĩkĩ matu mekekubaĩmisbu inũ Deusunabu matubetã ikũwãmisbu dasibiri ẽ hãtxa ẽ matu bumaii. Ha inũ, Italia mai pakea anushũ ikũwãmisbũ hatũ hãtxa matu bumariakanikiki.

²⁵Haskakẽ Epa Deusũ hau matu dasibi duawakubainũwẽ, hawẽ pepawenã.

Hatiski, ẽ hãtxarã.